



ЯМДЕ ЛИЙ

1933 ий 1 февраль годсек лектеш.

0+

Кидыште - МИКРОФОН



Наталья Ямаева (Курочкина) «Рен ТВ-12 регион» каналыште 2008 ий гыч ышта. Профессиональный телекамер ончык Медведево районысо Руэм шуко профилян лицейын 10-шо классыште тунеммыж годым икмыше гана лектын. Сылне марий тувырым чиен, «Шонанпыл» передачылан тоштер нерген каласкален. Нимогай лўдмашым, вожылмашым шижын огыл. Марий кугыжаныш университетыш тунемаш пурымек, тележурналистикым йўратенак шынден. *«Тачат телевиденийын омсалондемжым вончем веле, мыйым тыгай кугу кумыл, шижмаш авалтат. Пуйто вес тўняшке логалам, – ойла Наталья. Умбакыже ешара: – Журналист пашаште нелылык дене кажне кечын тўкнаш логалеш. Вет эфирыш лекше видеоматериал – тиде тўшка пашан саскаже, а лач редакторын веле огыл. Каныш я пайрем кечын пашашке чўчкыдын лекташ логалеш. Ме калык деке чын, тергыме да онгай уверым намиен шуктышаш улына».*

Теле- журналистикын ик кугу ойртемже уло: кидыш микрофоном налын, эфирыш лекме деч ончыч корреспондент чурийвылышыжым чиялтышаш, ўпшым тўрлатышаш да чийыме вургемже нерген шоналтышаш.

– Ўдырдам журналист корныш шогалташ шонедо мо?

– Илыш куанна, чон падырашна – Аня ўдырна. Кызыт тудлан 3 ий да 8 тылзе. Йошкар-Оласе 27-ше номеран «Тулшукш» («Светлячок»)

йочасадыш коштеш. Мыйже ўдыремым стоматолог але нервным эмлыше специалист семын ужнем. Тўняште мыняр тўрлў онгай да кўлешан профессий уло! Виеш темлаш огына тўнал. Адакшым тидын нерген ойлаш але пеш эр, шонем. Но, кугурак лиймекыже, журналист койышыжо палдырна але тиде сомыллан шўман улмыжым шижам гын, полшаш ямде улам. Кызыт ужам: видеокамер, фотоаппарат ончылно шкенжым пеш чолган куча. Можыч, иктаж передачым пырля вўдаш тўналына. Но Аня але изирак, чыталташ кўлеш.

Х.АЛЕКСАНДРОВА мутланен.

Эн ойыртемалтше серыш

Интернет тўняште

Мемнан илышыште мо гынауке? Мутлан, чылан палыме Интернетым налаш. Интернет дене пўтынь илышна кылдалтын. Ме кинон ончена, рецептым кычалына, мурым колыштына, ваш-ваш серышым возкалена, тўрлў йодышланна вашмутым муына. Но тыгодым Интернетын эңгекым кондымыж нерген мондыман огыл. Компьютер шинчам пытара, пайдале жапыл шуко налеш, тупрўдым эмгата, эсогыл кочмет-йўмет мондалтеш, йўд ометым пытара. Интернет пайдам кондыжо манын, кажне ең жапым ойырен моштышам.

Диана АЛЕКСАНДРОВА.

Морко, Эверсола.



Школна келшен



Школнан ончычсо выпускникше, а кызыт Бразилийысе Сан-Паулу олаште математикым тунуктышо, профессор А.А.Ямбарцев дене онай вашлиймашым эртарышна. Тудо илыш корныжо, тунеммыже да кызытсе пашаж нерген каласкалыш. Анатолий Андреевичын Анна ден Валентина ўдыржө уло. Нуно рушлат, марлат огыт мошто. Икте-весым умылаш кид дене ончыктылмат сита. Кызыт ўдыр-влакын каникул гынат, школышкына тунемаш коштыт: Анна индешымше классыш, Валентина нылымшыш. Нунылан школыштына пеш келша.

Валерия ОРЛОВА, 7-ше класс.

Марий Турек школ.

РЕПОСТ КОНКУРС!



Йолташ-влак,
https://vk.com/yamde_lii
ссылке дене эртыза да мемнан конкурсыш ушныза!

Кинде – илыш вий

Кинде – икымше кочкыш. Кинде огеш лий гын, айдеме иленжат огеш керт. Тудеч посна мўшкыр огеш тем. Ожно кинде ситен огыл, да тудым налаш чыла енын оксажат лийын огыл. Сандене тудым пайлен кочкыныт. Кызыт кинде чылалан сита. Ала-могай тўрлат уло. Ожно киндым конгаш шке пыштеныт.

Кызытат икмыняр ег тыгак ышта.

Киндын чапше нигунамат ок воло.

Данил ВАСИЛЬЕВ.

Морко, Шўргыял.



Кө лийнет? Полицейский!

*Эн кужу урок
54 шагат
шуйнен.*

*Шошым йоча-
влак кум пачаш
писынак куш-
кыт.*

*Москваште
«Детская литера-
тура» антологий
лектын. Тушко 55
йылме дене возымо
произведений-влак
пурталтыныт.
Марий автор-
влакат улыт.*

*Шошо
мардеж йўр
пушан, кеҥеж мар-
деж мій таман.*

*«Ямде
лий» газет
редакций 12
марий талешке нер-
ген рушла-марла возы-
мо «Марий талешке»
комплектым луктын.
Редакцийыште
налаш лиеш.*

*ТЮО
нормо
почеш 1-ше
классыште тунем-
ше рвезылан 30 метрым
6,1 секундышто куржман.*

*5-6
мартыште Та-
тарстаныште Юл
кундеммысе 3-шо
Интеллектуал олим-
пиаде эртен. Тушто
168 тунемше таҥа-
сен, Марий Эл
гыч 11 йоча
миен.*



Еш – илыш кече

Вич йочан Тимковмыт еш Одо (Удмуртий) кундемысе Грах район Маскаялыште ила. Ача АЛЕКСЕЙ Юрьевич тиде район гычак. Йырсе ялыште шочын-кушкын. Ава АЛЕВТИНА Михайловна шочмо ялешыжак илыш вожым колтен. Кызыт йоча дене шинча. Шке вийышт дене, а южгунамже ял калык полшен, кок пачашан пörтым чонгеныт. Вич икшывылан возын малашат, модашат, урокым ышташат вер сита. Пашадарым тўн шотышто ача конда, Йўдвельш пашашке коштеш.



Лўмышт – А буква дене




АДЕЛИНА ден **АРИАДНА** йыгыр улыт. Нунылан – 8 ий, 2-шо классыште тунемыт. Чурийышт дене икгайрак улыт, икгай чиен шогалыт гын, ойыркалыде, кудыжо кō – паленат от шукто. Но койыш-шоктышышт (характерышт) дене тўрлō улыт. Аделина тўн верышке тунемашым шында гын, Ариадна утларак спорт деке шўман.

Лудшо-влак, шекланышда дыр, ешысе йоча-влакын лўмышт чылаштын А буква дене тўналеш. Лўмын тыге шонен лўмденыт мо? Тўнгалтыште уке, лўмын огыл. Икымше ўдыр шочмек, ача-авалан Алина лўм келшен, марлашке кусараш гын, «Ош ўдыр» манме лиеш. Алёшалан ачажын лўмжым пуэныт – Алексей Алексеевич. Вара йыгыр ўдыр-влак шочмек, А буква дене тўналше лўмым кычалаш тўнгалыныт. Ужыныт: «7Я (семья)» чўккыдын вашлиялтеш, а нунын – «7А (СемьА)». Тыге Аделина ден Ариадна ешышке пиалым ешареныт. Изи Арсентийым кугезе качашт лўмеш лўмденыт, тудын гаяк ушан, виян лийже манме шонымаш дене. Тыге тукум кыл умбакыже шуйна.

ке кусараш гын, ончалза, могай сай мут шочеш: «ШыМА»: шыма ача-ава, шыма икшыве-влак да шыма еш.

АЛИНА – эн кугу шочшо. Тудлан 15 ий темын, тений 9-ше классым тунем пытара. Чыла предмет дене «визытанлан» тунемеш. Школым шōртнōй медаль дене пытарен, лётный училищыш тунемаш пураш шона. Кидпашалан мастер: йодмо почеш шоколад кагазым сōрастара але, интернет йылме дене ойлаш гын, шокобокс деке кумылан. Сылнын мура, моторын кушта, сценыште шкенжым моштен куча, марла яндарын кутыра.



АЛЁША 6-шо классыште тунемеш. Спортым пеш йōрата. Пу гыч пўчкедымаш кружокуш, Алина акаж дене пырля «Цармис» куштышо марий ансамбльыш коштеш. Теле каникул годым Сочи ола гыч 3-шо степенян диплом дене пōртылыныт. Кызыт Москвашке каяш ямдылалтыт.

АРСЕНТИЙ эн изи.

Шукерте огыл, 4 мартыште, ныл ийым темен. Аваж дене пырля мōнгыштō шинча. Но йокрокланаш жапше йōршынат уке: буква ден цифр-влакым тунемеш, аважлан вольыкым ончаш полша. Алина акажын ойлымыж почеш, ушкалым пешак йōрата. Чыла модышыжат вольык гына! Модыш машинаже пеш шуко: изижат, кугужат – кузе уке гын, вет кажне эргын технике модыш лийшаш! «Школыш кая гын, кугу акаж семынак «визытанлан» гына тунемаш тўналеш, очыни», – йывыртен ойлат ачаж ден аваже.

– Кунам ешыште шуко йоча, пōртыштō эре весела, шокшо, йўк-йўан шергылтеш. Ковам авамлан тыгерак ойлен: «Юмо йочан помышышкыжо шултыш киндым пыштен колта». Тиде ой авамын илыш девизше семын лийын кодын, – тыге кошарташке серышыжым Алина Тимкова.

«7А – семья» – марлаш-

Савыкташ Л.СЕМЕНОВА ямдылен.



2020 ИЙ
МАРИЙ ЭЛАН - 100 ИЙ

Ожно Лаж
энер серыште
шуко пашма
лийын. Тушто
ўдырамаш-шамыч
вургемым шўалтеныт.

Кызытсе кўвар воктене
Семон пашма верланен. Школ шентелне
– Тымапи пашма, а умбалныракше –
Кузьман пашма. Векат, чоңышо ең-влакын
лўмышт дене пашмалам лўмденыт.

Э.В.СМИРНОВА, туныктышо.
Шернур, Лажъял.

Пөтъял

Мый пеш чот йоратем
Пөтъял кундемем.
Тушто шочын-кушкынам
Да куатым налынам.
Поро, сай
йолташ-влакем,
Пырля школышко

коштам.
Шке кундемем йоратем.
Тудым аралем.

**Венера
АЛЕКСАНДРОВА.**
Волжский район.



Пампалче
туштым туштыш,
шергашла, сокыртага-
ла модыктыш.

Юзо тўняш унала



Параньга район Усола книгагудышто
«Юзо тўня» йомак пайремым эртарыш-
на. Тышке «Чебурашка» йочасадыш коштшо
икшыве-влак тольыч. Йоча-влак кугезе коча-
коваштын тошто шондыкыштым почын кол-
тышт, а туштыжо!.. Ожнысо вургем,
шымакш, сōрастарыме ўзгар да молат.
Шондык пундашыште тўрлō-тўрлō книга-влакын
муын луктыч. Эн шергаканже – «Ший
пўян ший Пампалче». Йоча-влак
деке тўн геройжо шкежак
унала тольо.

В.АФАНАСЬЕВА,
книгагудо вуйлатыше.

Буй ден Савак

Шочмо ялем чодыра воктене Буй да Савак
энер серлаште верланен. Тыште пеш мотор
пўртўс. Буй энер вес велне сорта гай
вияш пўнчō-влак шогат. Нуно патыр
Онар семын вожышт дене серым кучат.
Чодыраште тыгыде кайыквусо, янлык-
влак илат. Шиште чўчкыдын чодырам
шергылтара, меран але рывыж кудал
эрта. Буй ден Савак коклаште кумда
олык шарлен кия. Кенжежым тыште
вольыкым кўтат. Энер воктене йоча-
влак эныр дене каракам, олангым,
шийголым энырен шинчат.

Юля ВОЛКОВА.
Марий Турек, Сысоево.



Ялемым йоратем

Шочмо ялем – Корамас ялем.
Шочмо ялем – шўмбел ялем.

Ялем, ялем, тыйым
йоратем!

Тўзланал, пеледалт, элем!
Настя МИХАЙЛОВА.
Волжский район.

Патыр шордо

Мыйын шонго коваем пеш шуко йомакым пала.
Патыр шордо нерген ойлымыжо пеш келшен.
Мемнан кожлаште шордо ила. Тудо ынде шонго,
но пеш патыр. Шордым мотор улмыжлан да поро
чонжылан пагалат.

Мый шордым аклем, тудым марий Акпатыр да
ожнысо Онар талешке дене таҥастарем.

Арам огыл тиде янлыкым Йошкар-Олан гербышкы-
же сўретлыме. Канде щитыште нарынче короным чий-
ыше мотор шордо шога. Умбалныже – марий тўран
орнамент.

Мый кугешнем: тыгай янлык мемнан йоратыме
Марий Элысе чодыраште ила.

Юрий ОСИПОВ, 5-ше класс.
Йошкар-Оласе 1-ше номеран школ.
(Туныктышо – В.И.Рыбакова.)



Изи куэр

Ялышке пурымо годым тудо
кугун коеш. Чынак! Ялна шым уре-
ман. Пурет – мотор корем верланен,
йырже пушенге-влак шогат, тораштак
огыл изи куэр коеш. Воктенак – школ.
Тудо кок пачашан. Школ воктене стадион
уло. Тушто ме кенжежым модына: велосипед
дене кудалыштына, мечым чумена.

Всеволод НИКИТИН.
Кужэгер, Шўдымарий.

Ото олмышто

Ожно пакча шенгелнына кугу ото гүжлен шоген. Тушко изижге-кугужге кумалаш коштыныт. Совет власть толмек, отым трактор дене шүкенит. Ото олмышто лач кок пушенге шоген кодын. Тылеч вара тиде верыште түрлө туткар лиеден. Жап эртымеке, ото олмыш пушенге-влакым ешарен шындыме, каналтен шинчаш авыртышан верым ыштыме. Калык уэш тиде отыш кумалаш кошташ тўналын.

Эдита АЛЕКСАНДРОВА.
Морко, Арын.

Мотор вереш верланен
Мыйын шочмо ялем.
Тудын йырже – чодыра,
Ял покшелне – кугу пўя.
Эллада АЛЕКСЕЕВА.
Морко, Коркатово.

Огай

Х **Т** **и** **д** **е**
пушенге Ваштар курыкышто верланен. «Марий Чодра» национальный паркыште кушкеш. Волжский районышто верланен.

Х Пушенге 26 метр кўкшытан, 1,59 метр лопкытан.

Х 1969 ий гыч пушенге историй значениян чодыра объектлан шотлалтеш.

Х Шымлымаш почеш пушенге 1600 ийыште шочшалан шотлалтеш.

В.СМИРНОВ ямдылен.



Йоча-влак, палыза,
могай пушенге нерген
ойлалтеш?

Палыме лийза: Казакова Анук

(Мучаш. Тўналтышыже – 9-ше номерыште.)

Могайрак лийын вара чолга пионерке Анукын илыш пўрымашыже?

Шочмо верже – Медведево лишнысе Аксамат ял, шочмо жапше – 1920 ий 31 октябрь. Кыдалаш школ деч вара Озан олесе юридический институтышто тунемын, дипломым тулан 1942 ийыште налын. Ик талук жап

Курыкмарий районушто калык судьялан ыштымек, самырык юристым 1943 ийыште Марий АССР Верховный судын членжылан сайленит. Тушто пашаже сайынак каен, но вич ий гыч партийный пашаш кусаралтын. КПСС Марий обкомышто ончыч инструктор, вара сектор вуйлатыше лийын.

Вуйлатыме пашалан кугурак шинчымаш кўлын, сандене Анна Ильинична 1956-1958 ийлаште Москосо кўшыл партийный школышто тунемын. 1958-1962 ийлаште Марий АССР-ын культур министрже лийын. Лач тунам М.Шкетан лўмеш Марий драмтеатр кызытсе чапле полатыш куснен, икымше марий опер – Эрик Сапаевын «Акпатырже» – шочын. Йошкар-Олаште музыкальный труппо лийын огыл гынат, оперым шындаш пижыныт, да 1963 ий 5 апрельыште премьер пеш чаплын эртен. Тиде жаплан Анна Ильиничнам кугурак пашаш кусареныт – 1962-1972 ийлаште правитель-

стве (Министр-влак Совет) председателын алмаштышыжлан ыштен. Тыште тудын пашаже тыглай да профессиональный школ, культур, искусство, литератур, науко, физкультур да спорт дене кылдалтын.

Но тазалыкше начерештмылан кўра А.Казакова 1972 ий май кыдалне паша гыч каен, ийготшо шудеак (тунам 51 ияш гына лийын), пенсий-

ыш лектын. Тылеч вара латшым ий наре илен. Ёмыржө 1989 ий 22 февральыште кўрылтын.



Вуйлатыме пашаштат Анна Ильинична шке усталыкшым тичмашын ончыктен. Таклан огыл тудым Трудовой Йошкар Знамя орден, «Знак Почета» 2 орден да 3 медаль, РСФСР-ын Почетан грамотшо дене наградитленыт.

1935 ийысе письмаштыже латныл ийым эртыше Анук манын: *«Сайын тунеммем дене, ончыл ударнице улмем дене молылан примерым ончыктен тунем толым»*. Марий кресаньык ўдыр тылеч варажат: институтышто, суд органлаште, партийный да совет пашаште – молылан примерым ончыктен шоген, санденак тудым пагаленыт, акленыт, ятыр гана МАССР Верховный Совет депутатлан сайленыт. Кугу верыште «шинчен» гынат, Анна Ильинична йўштө чонан тўрашке савырнен огыл, пашаче еным, проста айдемым умылен моштен, тудлан полшаш тыршен.

Г.ЗАЙНИЕВ.

Шочмо йылме – уш-акыл памаш

Авторын фотожо.



Шочмо марий йылме да марий литература дене регион-влак кокласе олимпиадыште Марий Эл, Пошкырт, Татарстан республикла да Свердловск кундем гыч тунемше-влак шинчымашыштым тергенят.

– Кок предмет денат лу заданийлан вашмутым пуаш да темлыме теме почеш сочиненийым возаш кўлын, – палдара марий йылме дене жюри вуйлатыше филологий шанче кандидат, доцент В.Н.Максимов. – Йодыш-влак йылме наукин чыла ужашыжым авалтенят.

Моло фотом
vk.com/yamde_lii
электрон адрес
дене ончыза.

Тунемше-влак келге шинчымашым ончыктенят, сочинений темым раш почын пуэныт. Эшкык семын иктым палемдем: йоча-влакын мут шапашышт чўдырак, шомаклан синонимым муын огыт керт.

Литературышто писатель-влакын илыш корныштым, творчествыштым палымылан, теорий йодышлан кугу тўткылык ойыралтын.

Марий йылме дене сенгышыш лектыныт: **Анастасия Николаева** (Пошкырт, Мишкан, Тымбай, 9-ше кл.), **Анастасия Дмитриева** (Морко, Унчо, 10-шо кл.), **Олеся Васеева** (Шернур, Марисола, 11-ше кл.).

Кристина Быкова (Кужэнгер, Конганур, 9-ше кл.), **Наталья Алексеева** (Пошкырт, Мишкан, Чорай, 10-шо кл.), **Надежда Петухова** (Советский, Ушнўр, 11-ше кл.) марий литератур дене икымше верым сенен налыныт. Сенгыше-влакым снимкыште ужыда.

Л.ГРИГОРЬЕВА.

Чевергалын олма семын

Лида кокамлан

Чевергалын олма семын,
Кече эрден эр лектеш.
Пич йўд дечын мален темын,
Агытанже муралеш.
«Эй, кынелза!» йўкым колын,
Лида кокам помыжалтеш.
Да пашаче кутко семын
Сомылка дене куржталеш.
Пайрем кечын, сай кокай,
Шич, каналте воктенем.
Шошо мотор кече гай
Шокшо мутым ойлынем.
Мыланна пуэт у вийым,
Икшывет гай йўратет.
Ныжылге, ласка мутетым
Аралет тый шўмыштет.
Кумылет эре нўлталтше,
Таза лийже шўм-чонет.
Поро мут аршашым погалтен,
Пўлеклем, кокай, тылат.

Юлия ИВАНОВА.

Кужэнгер, Шорсола.

Кидмастар

Мамык
тыртыш-влак гыч
тыгай пеледышым ыштыза.

8 мартыште
Ўдырамаш-влакын
тўнямбал кечыштым
палемдышна.

**Шуко шоч-
шан ешыш-
те кушкыда?
Але пошку-
дыштыда
тыгай еш
уло? Чунын
нерген
мыланна
возен
колтыза.**



*Кужэнгер район Конганур школын
2-шо классыште тунемше рвезе-влак возат.*

Йўратыме авай

♥ Авамын лўмжў – Лена. Тудо мўнгыштў сурт сомылым ышта, мыланем уроклан ямдылалташ полша. Мый авам дене чот кугешнем.

Максим ЕГОШИН.

♥ Мыйын авам Таня лўман. Тудо мотор, пеш поро, ныжыл кумылан айдеме. Крючок дене модышым, мочылам, пўрткўргыштў кучылташ тўрлў арверым пидеш.

Никита ЯНДЕРШЕВ.

♥ Мый авамлан кўмыж-совлам мушкаш, пўртым эрыкташ да пум нумалаш полшем. Авам нигунам яра ок шинче.

Богдан БОГДАНОВ.



*Сай ешыште
сай икшы-
ве-влак
куш-
кыт.*

Шерге ег

Ава – эн шергакан айдеме тўняште. Мыйын авам эн мотор да эн ушан. Южгунам вурса гынат, туныктен вурса. Ава шке шочшыжлан нигунам осалым ок шоно. Мый авамым чот йўратем. Таза да кужу ўмыран лийже, шонем.

Милана ЕВДОКИМОВА.

1-ше номеран Морко школ.

Йодыш – вашмут

«10-12 ияш йочам пörтыштö ар улыкым ышташ кузе туныктыман? Света Д., Шернур район».

Изинек туныктыман

Психологий да педагогике, медицине да социальный польшым пуйшо «Детство» рüдерын педагог-психологшо Любовь Антоновна ГЛАЗКОВА вашешта:

– Икшывым пашам ышташ изинек туныктыман, 10-12 ияш лиймыжым вучыман огыл. Изиньогамак шке модышыжым погаш, пöлемысе кушкылыш вüдым шаваш, вий шутымыжо семын суртволькым ончаш кумылангдыман.

Йоча олмеш чыла сомылым ача-ава шуктен шогенит да трукышто туддеч ар улыкым ышташ йодыт гын, мутат уке, икшыве торешлана. Тудо ты сомыллан тунемын огыл! Эн ончыч, ок мошто. Сандене чыла пашам пырля ыштышаш улыт. Йочам мокталташ мондыман огыл. Жап эртымеке, икшывылан, мутлан, пöрткöргым шкетланже эрыктыктыман. Йоча кеч-могай пашам ышташ торешлана гын, амалжым умылыман.

Л.ГРИГОРЬЕВА ямдылен.



Паша нерген калыкмутым мучашле

Пашазын кидыштыже...	уш ок шич.
Паша еным...	малаш ок воч.
Паша деч посна...	айдемыш луктеш.
Паша маска огыл...	күртнö шула.



«Падыраш»

Авторын фотожо

Йошкар-Олаште але ола воктене илыше изи үдыр-рвезе-влакым «Падыраш» ансамбль вуча!

Марий тÿвыра рüдер пелен «Падыраш» йоча фольклор да семÿзгар ансамбль почылтын. Тудым Эльвира Васильевна Петрова вуйлата. Кызытеш вич йоча веле коштеш. Туге гынат, Уярня годым ох калыкым кузе куандарышт! 10 ияш Максим Киндулкин ден 6 ияш Денис Кудряшов тÿмырым талын кырат, Артём Михайлов бубеным шокта да тунамак муралтен колта. Тудлан Арина Могылдя яндар йÿкшö дене мураш полша. Икымше гана кугу сценыш лектыныт гынат, нимыняр лüдынöрын ышт шого.

Х.АЛЕКСАНДРОВА.

14 март – Энер-влакын тÿнямбал кечышт



Сÿретым чиялте.

Шошо кече

Толын шуо чевер шошо. Удыр-рвезе-влак уремыш лектыныт. Нуно пушенгылашке шырчык омартам сакалтат. Теве чыр-р, чыр-р йÿк шоктыш. «Тиде шырчык, шырчык!» – кычкыралыч йоча-влак. Икмыняр жап гыч шырчык чонештен тольо да муралтыш. Тыге тудо йоча-влаклан таум ойлынеже, «омартада мотко келшен» маннеже.

Анастасия СИДОРОВА.

Морко, Унчо.


Шырчык омартам лышташан пушенгыш гына сакыман.



МЧС шижтара:
 энер-влак апрель тÿналтыште почылтыт. Но ий ÿмбаке ида пуру – лüдыкшö!



Меранлан полшыза.



«Ончалза, могай мастар!»



Мый 7-ше клас-сыште тунемам. «Креатив» кружогыш коштам. Түрлө түсан тасма дене канзаши технике дене мотор деч мотор пеледышым ободокыш, заколкыш пижыкташ ыштем. Атлас тасма дене панном сöрастаренам. Шке кид дене ыштыме пöлекым эн моторлан шотлем.



Аня РОМАНОВА.

Звенигово, Эсмекплек.

КОНКУРС!

Лудса!

Книгам лудат гын, шуко пален налат. Школышто шуко лудына. Мөнгыштö кө лудеш, а **ТУШТО** кө уке. Ава книгам лудаш ойла гын, лудаш күлеш. Книгам от луд гын, ончыко от кай.

Ош пасушто шем шорык-влак коштыт.

Настя МИХАЙЛОВА.
Волжский, Кугу Корамас.

16 март – Омын тунямбал кечыже. 2008 ий годсек палемдалтеш.

Те, йоча-влак, суткаште 10 шагат деч шагал огыл малышаш улыда.

Йүдвошт айдеме 5 омым ужын кертеш.



«Ямде лий» газетлан – 85 ий

1972 ий 22 апрель.

К дене – күлеш улам тунеммаштыда.

М дене – пален кертыда тылзе лүмым;

П дене – тендам школышто шинчыктем.

Ваня БАРАНОВ.

Советский.

1976 ий 24 январь.

М дене пеледыш үмбалне Чонештыл коштам.

П дене лышташла коклаште Пырт веле коям.

Лида АКТАЕВА.
Шернур, Изи Чашкаял.

Йоча-влак, теат метаграммым возен ончыза да мыланна колтыза.

1979 ий 6 январь.

Т дене колхоз пасулаште шочам.

Л дене шурным опташ мый күлам.

П дене вүд гыч мый савырнем.

Ш дене йоча-влакым модыктем.

С дене ом күл нигунам нигöлан.

Л.СОЛОМИНА.

У Торъял, Токтарсола школ.

Физкультминутко

Кушкына ме писын, писын – Киднам күшкө шуена.

Изаем, изишак висе!

Ужат, кугу лийынна.

Н.ИЛЬИНА.


Волжский, Карай.



Кунам...

Кунам воктенем ава, Тунам волгалтеш кава. Кунам ялыштем илем, Тунам тауштен мурем. Кунам воктенем йолташ, Тунам весела кушташ. Кунам «визытан» – куан, Тунам лийына ушан.

Ирина МИХАЙЛОВА.
Татарстан, Агрыз, Пелемеш.



9 ойыртемым кычалын му.



Индекс: Марий Элыште, Пошкырт ден Татарстан кундемлаште - П4696. Тираж 1000 экз. Заказ 456. Формат – А-4-8. Директор-тун редактор Л.В.СЕМЕНОВА.

E-mail: yamde_lii@mari-el.ru, yamde_lii@mail.ru Сайтын адресше: yamde-lii.pro, Тел. 8(8362) 45-25-49(факс); 45-22-82.

УЧРЕДИТЕЛЬ-ВЛАК: Марий Эл Республикысе культур, печать да калык-влакын пашашт шотышто министерстве, «Ямде лий» газет» кугыжаныш унитарный казна предприятий.

Газетым редакцийште погым да верстатлыме, «СТРИНГ» ИПФ ООО-што ямде оригинал-макет гыч савыктыме. Типографийн адресше: 424006, Йошкар-Ола, Строитель урем, 95.

Газетым Массовый коммуникаций сферыште да культур наследийым аралымаште законодательством шуктен шогымым эскерыше Федеральный службн Приволжский федеральный округысо управленийыштыже регистрироватлыме. Номер – ПИ №ФС 18-1999, 2005 ий 10 февральыште пуымо.

Газетым Печать да массовый коммуникаций шотышто Федерал агентствын окса полшыж дене лукмо.

Соцсетъысе адрес-влак: ok.ru/yamdelii vk.com/yamde_lii

Авторын да редакцийн шонмашышт түрлө лийын кертыт. Серыш-влак мөнгеш огыт колталт.

Ак – кутырен келшыме почеш.

Редакцийн да издателын адресше: 424006, Йошкар-Ола, СССР Вооруженный Вийын 70-ше идалькыше урем, 20.